

# Guidada atras Sedrun

Tarcisi Hendry, Sedrun

*La guidada sa prender si' entschatta silla Spinatscha el senn sco cheusut preparau. In'entschatta dalla guidada sa denton era succeder naven dalla baselgia s.Vigeli. Tenor sco il temps stat a disposiziun ei da metter prioritads. Per quella guidada tenor il text drova ei senza dubi duas uras. Las detgas cheu alla fin ein pusseivolas dad integrar sco ins vul ni sco ellas van a prau, aschia per dar empau veta speciala, sluccar e dar atenziun alla guidada. Per attractivitar l'entira guidada ein fotografias en format A3 fetg gideivolas e san concretisar il raquintau. Plinavon frestgentan ed attractiviteschan era requisits la guidada; aschia il tgiern dil cavrer, ina cristalla, ina farcla, ina stiala da latg, .... (il museum metta bugen a disposiziun).*

**Liug**

**Tema**

Spinatscha  
(baun sper senda)

**Geografia/Historia**  
**Vischnaunca Tujetsch**



Oz cumpeglia la val **11** vitgs ed uclauns, numnadamein: Tschamut, Selva, Dieni, Rueras, Zarcuns, Camischolas, Gonda, Sedrun, Bugnei, Surrein e Cavorgia.

La val dumbra **9** vals lateralas. Da vart seniastra s'extendan viers nord las vals, entschiet da sum engiu viers ost (**5**): Val Val, Val Giuv, Val Mila, Val Strem e Val Bugnei. Encunter sid las vals (**4**): Val Maighels, Val Curnera, Val Nalps e Val Gierm. Da vart seniastra aunc ils **3** valla's Pulanera, Ondadusa ed il Run.


La val dumbra **66** pézs. Da quels ein **18** pézs cumpleinamein sin territori dalla vischnaunca, **25** s'extendan sil cunfin dil cantun Uri e sis sil cunfin dil cantun Tessin. Culla vischnaunca da Medel partin nus **13** e cun Muster quater cuolms.

Lags naturals dat ei rodund **10**, il bischu ed il pli enconuschent ei il Lag da Tuma che fuorma la tgina dil Rein. Ils **3** lags artificials ein en Val Nalps, en Val Curnera, giu la Centrala dalla Axpo e pil divertiment il Lag

da Claus. Ils flums ellas vals ein reins senza in agen num, els selaian numnar Rein da Nalps, Rein da Strem eav. Il flum principal ei il Rein Anteriur che sbucca suenter **1233** km a Rotterdam ella mar. Il pli bass punct ei a Nislas cun **1242** m.s.m ed il pli ault sin **3328** m.s.m ei il Pèz Tgietschen (Oberalpstock).

La surfatscha mesira **133.91** km<sup>2</sup>; da quei **5650** hectaras alps, **700** ha praus ed èrs e **1351** ha uaul, **45%** ei tiara nunproductiva. Igl onn 2024 dumbra la val **1238** habitonts.

Suttapeis schai Sedrun; davos nus si la Val Ruinatsch (ruina + - atscha=ruina pintga/macorta). La Scanziala e la Val Ruinatsch han furniu avon mellis onns il material sil qual il vitg da Sedrun ei vegnius



baghegius – sin in run, sin ina bova e perquei era il num dil vitg «sil run=Sedrun» (Rueras schai era sin material d'ina bova). La historia documentescha il num igl onn **1483** Surdragun, **1555** Sadrun, Sudrun e **1557** Sudragun.

Zatgi ha zacu viù el crest sur Sedrun ina scantschala sco en baselgia ed aschia ei il num Scanziala en versiun tuatschina naschida. La pendeza da quest liug (Spinatscha), ni la differenza d'altezia da mar entochen alla baselgia da s.Vigeli munta **48** meters.

La colonisaziun principala dalla val ei sefatga sucessivamein denter il **9 e 12avel** tschentaner. Il vonn el funs culs vitgs denter Bugnei e Dieni ein tgunschamein stai ils emprems.

Sedrun ha retschert igl emprem sanctuari igl onn **1205** e cun quel era il santeri dalla val e quei ha posiziunau el tochen al di dad oz sco vitg principal dalla vallada. Atras tuts tschentaners ha aschia la baselgia da s.Vigeli valiu per baselgia dalla val. Quei se manifestescha era cun la posiziun dad ella, buca amiez il vitg da Sedrun eis ella vegnida construida, na, agl ur dil vitg e veseivla naven da Dieni e Bugnei, da Surrein e Cavorgia anora. La part sura dalla val cun Tschamut e Selva fuva lu aunc buca colonisada, per el **13/14avel** tschentaner.

L'aua ha il vitg retschert dalla Val dils Bischels e menau quella en in dutg da sum tochen dem atras il vitg tochen giu las Vals per sbuccar lu el

	<p>Rein Anterior. Il num «bischels» tradescha che zacu hagien ins era menau l'aua en bischels da lenn.</p> <p>L'emprema aua vegn menada directamein en bischels da gusa, naven dad enasil Run el liug numanus las Schibas giu el Hotel Cruna. Igl onn <b>1906</b>, cun l'erecziun dil hotel (part da crap), meina la famiglia Decurtins l'aua dalla Val Custeri giu en siu niev hotel, igl Alpsu. In aquaduct per tuts vischins vegn eregius silla Val Bugnei igl onn <b>1911</b>.</p> <p>Enamiez il vitg croda la Tgès'alva en egl, encunter ost las casas pli novas ed alla fin schizun edifecis gronds che dattan buca exnum ina biala pareta al vitg. Sur decennis ei la fin dil vitg stada cul Sontget dils Gedijs (eregius <b>1836</b>) ni il liug cul num local Curtin. Quei liug possedeve in curtin per serrar en ils tiers per las pli differentas caschuns, aschia era ils stiarls che mavan alla fiera da Ligiaun.</p> <p>Encunter vest sesanfla il vischinadi da Gonda, oz ina part che vegn semplamein quintada tier Sedrun, avon onns denton in vitg cun atgna autonomia, oravontut cun dapli pastira che Sedrun e lezs ein stai d'engraui da saver duvra tarzgei pastira dad els. En bia graus ein els era semess ensemen, aschia cun fundar societads da tratga. Las cauras da Gonda ed il pors sco era las nuorsas la primavera, fuvan sut in pastur, pils animals da casa veva mintga vischinadi in paster da casa.</p> <p>El nord s'extenda il mises da Cungieri (Cugn/scrotta dil Gieri), il Sedrun Sura, l'Acla e la Caschlegia, praus maghers e pastira.</p> <p>Igl uaul sur Sedrun ei vegnius decimaus e maltractaus duront decennis sche buca tschentaners. La badugna ei vegnida duvrada per iseglia, la lenna per baghegiar e per scaldar. Meinsvart ha in stemprau aunc decimau la squadra digl uaul da Niregl. Aschia ei igl uaul vegnius sut schetga (schurmegiaus cun strentgas ordinaziuns da tagliar lenna) ed ina replontaziun ha giu liug. La miseria digl uaul han era ils tiers manedels caschunau cun magliar giu dafertontier carschientscha nova. Ei era la moda da catschar ils tiers manedels, cauras e pors da tut unviern ordaviert, las cauras mavan era ad ault ed ils pors traversavan il vitg per forza anflar zanza ina buccada. Pér ils onns <b>1960</b> ein ils pors vegni scumandai cun risguard sil turissem fluent.</p> <p>Sut Sedrun sederasan ils bials praus agricols dil vitg, la squadra gest sut baselgia vegn numnada «Prau da Vitg». Avon gnanc aschi da ditg eran leu aunc muschnas veseivlas carschidas entras la crappa ch'ins anflava dad arar.</p>
	<p><b>Bovas e lavinas</b></p> <p>Il prighel da bovas sul vitg ha sfurzau ils vischins da Sedrun ad ina prevenziun. La Val Ruinatsch e la Val Custeri ein stadas quellas cun potenzial da smanatschar il vitg cun bovas. Cungieri ei zacu vegnius vesius sco prighel da sbuar ni prighel da furnir da memia aua alla Val Ruinatsch e procurar per in run cun aua destruenta. Perquei ei vegniu cavau in foss a Cungieri per menar l'aua vi el Drun. Quel ei adina vegnius mantenius e vegn aunc oz procurau che l'aua flessegi vi el Run. Aunc ils onns <b>1980</b> ha la Val Custeri smanatschau ed ina bova cun aua e material ha tartignau la vischinonza dil Sontget dils Gedijs.</p> <p>Era las lavinas han smanatschau il vitg. Igl uaul el nord dil vitg ei vegnius sminuius a moda nunponderonta il <b>19avel</b> tschentaner, aunc l'entschatta dil <b>20avel</b>. Stempraus han contribuui il lur. Igl uaul sur</p>

	Sedrun ha stuiu vegnir replantaus. Tuttina resta aunc in prighel per Niregl a caschun da grondas nevadas.
	<p><b>Electricitad</b></p> <p>L'emprema energia electrica furnescha il mulin giudem Gonda igl onn <b>1918</b> ad entgins privats, mo beingleiti (era <b>1918</b>) han tuts vischins saviu retscheiver energia electrica entras l'aua dalla Val Strem cun in conduct da pressiun naven da Salins giu ell'ovra hidraulica a Gonda dalla Installaziun electrica Sedrun, pli tard Ovra electrica Tujetsch (<b>1968</b>) e dapi entgins onns cul num energia alpina.</p> <p>Il conduct electric ATEL (Aare-Tessin Aktiengesellschaft für Elektrizität), eregius <b>1949</b>, surmunta il Lucmagn, traversa la Val Medel, sur Mumpe Medel e Mumpe Tujetsch, arriva il conduct ella val e traversa la Val Mila per contonscher il cantun Uri.</p>
	<p><b>Cristallas</b></p> <p>La val Tujetsch ei in mund, ina val da mineralias e cristallas cun ina rihezia unica. Il diember da minerals anflai dumbra rodund <b>100</b>. Il pli derasau mineral ei il quarz, il clar ed il brin. Cavar cristallas ei in hobby che rodund <b>35</b> Tuatschins execueschan. Dunnas han tochen oz aunc buca ughegiu da praticar quei passatemps.</p> <p>Per astgar encurir drova ei ina patenta che vegn retratga tier l'administraziun communal. Schluppentar astgan mo ils indigens. Ei in plaz da lavur occupa cun uaffens, vala quei sco liug schurmegiaus per quei cavacrappa (codex d'honor). Mintg'on vegnan fatgas bunas anfladas. La vischnaunca ha ina certa preferenza da cumprar rauba sensaziunala pil museum. En tutta cass ei la viseta en niss museum dalla val il meglier per veser las raritads da nos cuolms ed anfladas specialas sco il pli grond Milarit anflaus igl onn <b>2000</b>.</p>
<b>Punt dalla viafier</b>	<p><b>Viafier</b></p> <p>La viafier ei ina aveina da traffic per la Val Tujetsch dapi igl onn <b>1926</b>. La historia dalla vaifier ei stada turbulenta e buca senza incaps. Duas concessiuns ha la Confederaziun dau ils onns <b>1907/1908</b>. Igl onn <b>1910</b> vegn fundau l'Associaziun da baghegiar ina viafier da Brig a Mustér (98 km) cul num BFD (Brig-Furca-Disentis) cun surtut capital franzos (38 milliuns) per promover il turissem ella Val dil Goms, ad Ursera ed ella Val Tujetsch. A Mustér ei la Viafier Retica arrivada igl onn <b>1912</b>.</p> <p>Las lavurs entscheivan igl onn <b>1911</b> cun varga 3000 luvriers reparti sigl entir tschancun denter Brig e Mustér. Igl onn <b>1913</b> arriva in tren d'emprova cun passschiers en da Mustér a Sedrun. In document el cudisch da hosps dil Hotel Alpsu, Sedrun, dat perdetga. Igl onn <b>1915</b> ei igl entir trassee a fin, inclusiv il tunnel dil Furca (1.8 km). Ell'Europa furiava l'Emprema uiara mundiala e damai ch'il capital finanziel vegneva dalla Frontscha ha quel calau si ed aschia era tuttas lavurs per terminar e metter en funcziun la viafier. Bein ei il tschancun Brig – Gletsch quasi adina staus en funcziun. Tut igl auter ha la natira surpriu ed igl onn <b>1923</b> fuvan biaras rodaias carschidas en ni satradas da sbuaus e crappa. La societad primara ha fatg concuors. Sin iniziativa da personas dil maun public, la Confederaziun e Cantun. Ils 17 d'avrel <b>1925</b> seconstituescha a Berna ina nova societad cul num «Viafier-Furca-Alpsu» cun in capital d'aczias da 3,3 milliuns. Scochemai ei vegniu cuntinuau</p>

<p><b>Staziun Sedrun</b></p>	<p>cun las lavurs ed il meins fenadur digl onn <b>1925</b> cursava la viafier gia denter Sedrun e Mustér. Cauinschignier Erminio Bernasconi che habitava a Tschamut ha giu gronds merets per la terminaziun dalla VFA. Gl'entir tschancun ei lu vegnius inauguraus l'entschatta fenadur digl onn <b>1926</b>.</p> <p>Cheu al sutpassadi, savess atgnamein era la staziun principala da Sedrun star. La damonda staziun a Gonda ni Sedrun ha fatschentau beinenquala radunonza da vischnaunca. La finala ha Gonda survegniu la preferenza. <i>“Arisguard la staziun da Gonda/Sedrun vegn ei, suenter haver tedlau ils differents meinis ed aviert la discussiun generala en caussa per Gonda ni Sedrun, concludiu ils 17 da mars 1912 cun 97 encunter 73 vuschs, che la staziun Sedrun/Gonda dueigi restar sco previu els plans a Gonda e buca vegnir translocada a Sedrun.”</i> Ella ei aunc vegnida reponderada en ina radunonza communal dils 8 d'avrel <b>1912</b>, denton senza midar il conclus anteriur da baghegiar la staziun a Gonda. Viu dil pugn da vesta dad oz ein ils vischins stai prudents cun preferir quella sligiazium. Gonda ha lu aunc giu igl avantatg da retscheiver ina via da colligiazium cun la staziun naven dalla via principala.</p> <p>Ils onns <b>1940</b> ei la viafier vegnida baghegiada ora segira pil traffic d'unviern, quei sin squetsch dalla armada svizra per ver aviert la traversala enviers igl ost dalla Svizra. La prolungaziun dil tunnel dil Calmut e las differentas plontaziuns denter Val Val ed Uaul Tschuppina han garantiu dapli segirtad duront igl unviern. Duront igl unviern ei quei per Tujetsch e la Cadi numnadamein la suletta pussevkladad d'arrivar ad Andermatt ed ella Svizra Centrala. Denter <b>1973</b> e <b>1982</b> vegn il tunnel da basa da 15.4 km eregius denter Oberwald e Realp per 311 milliuns. Igl onn <b>1961</b> succeda la fusiun cun la viafier da Caschinutta (Schöllenenbahn) ed igl onn <b>2002</b> quella cun la viafier Zermatt ed ella senumna naven da lu Viafier Matterhorn Gottard.</p> <p>Il Glacier Express, ina dallas pli attractivas purschidas da Zermatt a S. Murezi ei dapi igl onn <b>1930</b> en funcziun.</p> <p>Pil turissem ei la viafier indispensabla ed ella ei en general stada per Tujetsch in cletg ed ina essenziala investiziun pigl avegnir dalla val. L'integraziun dalla viafier el bigliet dallas pendicularas ei ina purschida che vegn schazegiada da nos hosps ed indigens.</p> <p>Sper la viafier ei secapescha ina via atras la val stada pli che impurtonta e necessaria dapi la colonisaziun dalla val. Dapi igl onn <b>1837</b> vegn fatg studis da baghegiar ora la e senda stretga, sul pass mo in trutg, ad ina via per carrs e menadiras. Ils onns <b>1840</b> vulan schizun las vischnauncas baghegiar e finanzia la via atras Cadi/Surselva. La finala succeda la construcziun dalla via atras la val e sul pass ils onns <b>1862 – 1864</b> entras il cantun. La via dil pass vegn baghegiada ora e slargada il temps d'uiara. La via ei ils davos onns vegnida slargada, aschia tras ils vitgs. Stuiu spitgar ditg ha la via stretga dadur Bugnei e finalmein vegn <b>2024/2025</b> megliurau e slargiau il davos tschancun streg dalla val, numnadamein a S.Brida. Naven da lu posseda la val ina grondisua via sigl entir territori communal.</p>
<p><b>Clavaus sisum Sedrun</b></p>	<p><b>Agricoltura</b> Il sparta principala e quasi suletta da viver ella val ei stada entochen viaden els onns <b>1950</b> l'agricultura.</p>

Ils emprems tschentanners giugava la tratga da nuorsas la gronda rolla. Ils armauls fuvan cheu pigl agen diever, per latg e carn, il curom ed igl animal per la lavur. L'elavuraziun dil latg ha denton priu tier. Igl onn **1805** ei documentau la vendita 750 kg caschiel el nord dall'Italia per 510 frs. Il viadi tochen leu ed ils cuosts ein carschi ed ils purs midan tec a tec vi sin la tratga da biestga. Duront decennis ei il hanletg da stiarls staus l'entrada principala alla fiera da Ligiaun ni schizun el nord dall'Italia. Il marcau da purschals succedeva el cantun Uri, las cauras el cantun Tessin. Ils onns **1870** stuevan ils Tuatschins alimentar rodund 4000 animals il temps d'unviern. Ins patratgi vid la gronda raccolta da fein che quei pretendeva. Ei tunscheva buca mo culs praus grass e maghers, na, senza fein selvadi fuss ei buca stau pusseivel.

L'entschatta dalla modernisaziun agricola entscheiva ils onns **1950/60** cun las empremas maschinas da segar e transportar. Quellas purtavan lu ils suandonts nums: Jrus, Schanzlin, Famoia, Rekord, Grundler, Graweli, Bucher, Aebi, Rapid e Buurekönig. Lu fuvan aunc quasi 90% dalla populaziun activs el puresser.

Oz lavuran aunc rodund siat menaschis purils ell'entira val, entgins paucs purs da nuorsas ed in cun cauras. La tendenza ei regressiva.

### **Nuegls e clavaus**

El vitg da Sedrun dat ei oz aunc nov clavaus construi cun lenna rodonda, 8 clavaus construi cun aissas, in clavau per gronda part da crap e duas stallas modernas novas.

In clavau resch niev cun lenna rodonda consumava ina massada da lenna, aschia tochen 80 tocs. In clavau resconstruius ed engrondius empau pli pauca, aschia 40 tocs, ins fageva diever dalla lenna veglia. Per la lenna stueva vegnir tschentau la damonda allas autoritads, quei per baghetgs, casas, gie schizun per in schalun (moni d'ina faultsch). La munconza da lenna ha menau alla decisiun ch'igl ei vegniu promoviu, beneventau e remunerau finanziamein la construcziun dalla part giudem, pia il nuegl, cun crap. Era il diever da dapli crap per la part suren ei stada giavischada, aschia ein ils cantuns da clavaus vegni construi cun crap e spargnau in bien quantum da lenna. Era mirs enstagl seivs da lenna vegnevan bonificai.

Ei vegneva construiu nuegls da 12, da 16 ni da 20. In da 12 veva plaz sis punts-nuegl ed aschia 12 armauls. Il da 16 deva plaz a 16 armauls sin 8 punts-nuegl e quei fuva tier nus il clavau il pli derasau sper quel da 12. Il da 20 cun sias 10 punts-nuegl deva plazz a 20 armauls. Savens vegneva aunc plazzau davostier dalla vart en in nuegl pils tiers manedels. Avon mintga nuegl steva vegnir plazzau la grascha che duvrava era siu plaz. Il clavau veva per ordinari 4 ladretschs, pia era el en possess da quater purs che sedrizzavan cul perver. Cun artar vegneva partiu si ils ladretschs e beingleiti savevan 8 purs esser possessurs d'in clavau. Ei saveva lu era schabegiar ch'ina otgavla part, ni pliras vegnevan, puspei spartidas ed ei deva in possess dad 1/16 avel.

Oz ei quei in bien motiv ch'ils clavaus ein semanteni, pertgei che mintga possessur sto dar la lubientscha da vender e biars ein leds da ver in plaz da deponer dallas uisas rauba.

**Stiala da latg**  
**Il diever dalla stiala da latg**

La stiala da latg consista ord ina buccada lenn, il bia draus ni culeischen da circa 15 cm lunghezia e 3 cm el diameter. Secund il diember dils pursanavels dalla caschada vegn quella buccada lenn dulada ora en 5, 7 ni 8 cantunadas.

In tagl tagliaus en e tagliaus ora sut la noda traviers la cava liunga, ha la valeta da diesch crenas, che vegn denton era numnaus «ina crusch» In tagl mo tagliaus en e buca tagliaus ora munta tschun crenas ni «mesa crusch».

Alla fin da mintga surfatscha da scadin pursanavel vegn indicau cun cuorts tagls, tagliai ora in cugn sigl ur dil lenn che munta ina crena, in tagl pign che pren naven nuot dil lenn munta ina mesa crena. Antruras valava la peisa veglia da crenas suandontamein 1 crena = 5/8 kg = 625 gr.

Enamiez e sisum la stiala fuvan las nodas casa da mintga pursanavel. La dumengia suenter il survetsch divin liquidavan ils purs il quen da latg. Cun tagliar naven las indicaziuns da peisa vegneva quittau e confirmau la gestadad. Las nodas restavan e vegnavan magari surdadas als affons per far termagls.



Stialas de latg ord la Val Tujetsch

In exempel silla stiala cun crusch, tier la noda A: 72 1/2 crenas latg = 7 cruschs + 2 1/2 crenas; noda P: 46 crenas = 4 1/2 crusch + 1 crena. Ils quarts vegnan buca quintai.

Las stialas ein beinsavens vegnidadas ornadas cun ornaments, tgaus humans e d'animals e tuoretas. Il pli cumplicau

fuvan tuors cun egl intern ina rucla. Quei fuva quasi la luschenzia e la coronaziun digl entagliader (nr. 3 cheusut). Bugen vegnevan quellas stialas decoradas schenghegiadas allas feglias dils pursanavels per mussar simpatia, mo savens era in tec dapli.

Archiv cultural  
Tujetsch

**Archiv cultural**

Igl archiv cultural (eregius entras il Forum cultural Tujetsch, construius 2025 e planisau da Gion A. Caminada, Vrin) ei igl arcun dalla cultura populara, quella dil pievel, dil singul carstgaun e dallas cuminonzas.

Documents e scartiras che han ina relaziun cun Tujetsch vegnan conservai e protegi. Da quei ei la noziun «arcun e truca da scazis» naschida. La cumparsa dil baghetg, ni casa ni clavau, duei explicar anoviars la funcziun da schurmetg.

La edificai (ni casa ni clavau) da stric ei il tip tradiziunal dallas casas tuatschinas. Ils quaders vegnan plazzai in sur l'auter ed els cantuns cavistrai in cun l'auter, aschia ch'els tegnan vicendeivlamein. Ina part dil baghetg vegn tenius da petgas da lenn filigranas.

La fassada davontier, viers sid, vegn tschentada sin ina gronda petga.

Primarmein era quella planisada ord lenn. El decuors dil process semida quella petga da lenn en ina petga da crap. Tiel crap setracta ei d'in diorit, ina cumposiziun da granit e grabbo cun colur miez gris-blaua.

	<p>Il crap stat perschadentamein e nunballuccabels agrads sco in grep, sco ina guardia ed el vegn a survivor generaziuns, el vegn a far studegiar generaziuns ed el tegn la cultura tuatschina per generaziuns. Il crap, il diorit da Tujetsch, fa ord igl archiv cultural in liug special ed unic. Igl archiv ei accessibels per mintgin tenor las uras d'avertura, mo era sin damonda.</p> <p>Il baghetg secumpona d'in local d'entrada, d'in zuler liung cun cudischs, ina cuschinetta, ina tualetta, ina sala e senn d'in luvratori da e per la cultura, in magazin per las archivalias, in biro pigl archivar; ella alzada sut sesanflan ina saletta, in magazin, in local per la tecnica ed ina tualetta. Igl archiv cultural cuntegn:</p> <ul style="list-style-type: none"> <li>- varga 300 scatlas cun documents, films, fotos, brevs, ...</li> <li>- pliras bibliotecas, ina biblioteca documentara, litteratura romontscha, biblioteca religiosa, da scola, da musicalias, las periodicas romontschas, ed aunc auter.</li> </ul> <p>Igl archiv porscha era in program cultural cun diversas occurrenz en rama da TujetschVIVAcultura.</p> <p>Il menaschi vegn dirigiù e menaus dil Forum cultural Tujetsch. Il baghetg sez ei en possess dalla vischnaunca che contribuescha il lur per manteniment e cuosts da menaschi.</p>
<p><b>Bogn Sedrun</b></p>	<p><b>Turissem</b></p> <p>Suenter l'avertura dalla Via Alpsu ils onns <b>1860</b> arrivon ils emprems viandonts en Tujetsch. Sin fundament dad impurtaziuns els cudischs da hosps dils hotels, settracta ei cheu da rehs Tudestgs svizzers, dalla Tiaratudestga, Engles, mo era Americans passants. Ils emprems hotels ein La Cruna (constuius ils onns <b>1850</b>) ed il Hotel Rheinquellen (<b>1866</b>) a Tschamut.</p> <p>In auter impurtont ed essenzial impuls vegn neu dad Andermatt. Igl onn <b>1910</b> arrivon ils emperms skiunzs sul pass e sveglian els Tuatschins igl interess pil sport da skis. Gia igl onn <b>1914</b> vegn il Club da skis Tujetsch fundaus. Igl onn <b>1929</b> vegn schizun la scola da skis fundada, la secunda el Grischn suenter S. Murezi.</p> <p>Ils onns <b>1920/1930</b> han mintga unviern liug jamnas da sport da hosps ord il cantun Turitg. A Turitg vegn fundau <b>1928</b> ina secziun dil Club da skis Tujetsch/Tavetsch cul num "Sektion Unterland". La Secunda uia mundiala interrompa quei svilup.</p> <p>Ils onns <b>1950</b> flurescha plaunsiu l'idea da danovamein promover il turissem d'unviern. La sutgera Cungieri vegn eregida igl onn <b>1956</b> e sil Pass Alpsu vegn construì igl emprem runal igl onn <b>1959</b>. Igl onn <b>1962</b> vegnan ils runals da Dieni a Cuolm Val construì.</p> <p>Naven da lu succeda ina carschen cuntinuonta tochen al di dad oz. Actualmein fuorma igl intschess dad Andermatt ensemen cun Tujetsch e Mustér in grondius e variont territori d'ir cun skis.</p> <p>Il Bogn Sedrun ei vegnius baghegius d'ina Societad acziunara ed aviarts igl onn <b>1971</b>. Igl onn <b>1987</b> cumpra la vischanunca il bogn. Igl onn <b>1993</b> succeda ina renovaziun e sanaziun dil Bogn cuvretg cun la reavertura ils 19 da december <b>1993</b>. Ingrondaziun cun ina partiziun da Wellness/Bogn Cuvretg succeda ils 18 da december <b>2004</b>.</p> <p>Ina renovaziun urgenta ed ina engrondaziun cun novas purschidas</p>



	vegnan executadas el decuors dils onns <b>2023</b> e <b>2024</b> . Las festivitats d'avertura han liug ils 19 d'october <b>2024</b> .
<b>Museum La Truaisch</b>	<p><b>Cultura</b></p> <p>Decennis e tschentanners ha oravontut la cultura en connex cun la religiun giugau la rola principala. La baselgia catolica ha lubiu quei ch'ella leva e quei che pareva ad ella seguir da schar praticar. Giugs da tuttas sorts ha ella teniu en egl e per part scumandau. Il tscheiver ei vegnius tenius sut controlla e las seras da giuventegna cun participaziun dil plevon. Ei dependeva sco adina da mintga singul plevon. Igl onn <b>1839</b> ein plirs umens vegni castigai pervia da giugs ed ir entuorn la notg ils 9 da fevrer, denter quels era il sur Camenisch, dus mistrals ed il sechelmeister ed igl assistent regent. Ils onns suenter <b>1850</b> ei la baslegia stada rigurusa en quels garus da controlla. Ils regulativs e reglaments da vischanunca stevan era sut la controlla dil plevon ed a caschun dallas elecziuns communalas stueva vegnir clamau il plevon sin quella vischnaunca. Quella cultura cuoza per part tochen viaden el <b>20avel</b> tschentaner. La midada generala ella val (ils onns <b>1960</b>) possibilitescha era da fundar novas uniuns sper quellas tradiziunalas da cant, musica, teater, cumpignia da mats. Ussa neschan uniuns da sport e spartas cun medems interess senueschan ad ina uniun. La fluctaziun d'uniuns ei denton era daventada in aspect negativ dils davos onns.</p> <p>Il Museum La Truaisch ei vegnius eregius il dretg mument. La cultura era sin svanir ord la val, daventada rauba da hanletg e gudogn. Cun la casa dils Monns ei sepurschida in edifeci ideal, buca tradiziunal, per arcunar nossa cultura: biaras stanzas, grondas e claras, quater alzadas. El sutterran in ideal plaz per las cristallas e nos prezios minerals. Ina sala porscha la pussevividad da luvratori cultural, mussar films, sentupadas, discussiuns, radunonzas ed auter bia.</p> <p>La casa ei vegnida eregida igl onn <b>1899</b> da Sigisbert Monn sesents lu a Bellinzona sco luvrer dalla Viafier Federala. El ha vuliu ereger en sia patria ina casa da vacanzas per sia famiglia. Quels onns entuorn <b>1900</b> ha la vischnaunca pretendiu da baghegiar da crap, la munconza da lenna era daventada enorme ed efectuava in derasau prighel da lavinas e bovas muort la munconza da schurmetg. Quels onns ei a Sedrun aunc il Hotel Alpsu vegnius baghegius ed a Rueras duas casas, la fravia ed il Hotel Posta.</p> <p>Dalla famiglia dils Monns ei la casa stada habitada tochen ils onns <b>1960</b>, lu cul il davos Monn, il Sebastian, ei morts, in um cun duns da pinar da tuttas caussas e trafficava dallas uisas en siu luvratori sutterran. Siu fegl ha lu vendiu <b>1981</b> la casa alla vischnaunca e lezza ha el decuors da tschun onns fatg ordlunder il Museum La Truaisch, igl arcun cultural, e rimnau ils exponats museals.</p> <p>Il museum ha aviert las portas igl onn <b>1986</b>. Senza dubi ha el era aviert ils egl alla populaziun per la cultura indigena. Ils davos onns ei legreivlamein bia niev material museal flessegiaus ellas stanzas dil museum. Cun exposiziuns specialas emprovan ils responsabels dad attractivitar mintg'onn la purschida. Exposiziun specialas permanentas sco la cultura da glin e la vischala dalla manufactura da Bugnei ein senza paregl da muntada essenziala per la cultura tuatschina.</p> <p>Il bischu dil museum eis enza dubi la partiziun da mineralias e cristagls.</p>

	<p>Cun rodund 100 minerals, las cristallas da nos cavacrappa dadas ad emprest e las mineralias acquistadas dalla vischnaunca fuorma il museum in dils pli bials museums da minerals dalla Svizra. In enrihament han era las mineralias anfladas el tunnel da basa NEAT purtau al museum. Il pli unic mineral ei il pli grond e pli bi Milarit dil mund anflaus igl onn <b>2000</b>.</p>
<b>Tgès'alva</b>	<p><b>Casas</b>  Las pli veglias casas dateschan dall'entschatta dil <b>19avel</b> tschentaner. Las midadas dils onns <b>1960</b> ella val han finanziamein possibilitau da renovar las casas veglias ni schizun disfar ellas, per semeglia la casa veglia pervenda, in baghetg tardiziunal el stil Gottard ed eregida sut l'egida da sur Giusep Maria Camenisch, <b>1822-1832</b> plevon da Tujetsch. Ina da sias casas ei era stada il vegl Hotel Alpsu (Schenca) ed oz aunc existenta ei la "Casa gronda" sut via.</p> <p><i>Tgès'alva</i>  Quella casa ei in unicat, posiziunada amiez il vitg e da crap. Negin enconuscha aunc la vegliadetgna. Cun intercurir ils lenns el tschaler fuss ei pusseivel da datar ella. La construcziun vegn carteivel ad esser succedida el <b>17avel</b> tschentaner. Davart ils posesurs raquenta la tradiziun suandontamein: Ella seigi vegnida construida da persunas che seigien stadas sco mercenaris sut crunas jastras, forsa en Hollandia, ell'Italia ni tiel papa a Ruma. Culs daners recaltgai hagien els vuliu baghegiar ina casa tenor lur enconuschientschas fatgas en tiaras jastras. Ina stiva ha sia historia, en quella hagien numnadamein ils Franzos sfraccou si ina scaffa dil puffen e la mudergiada culla bajonetta ei aunc oz da veser.</p> <p>Avon entgins onns ei la casa vegnida renovada ed el plantiu ein habitaziuns vegnidas eregidas.</p>
<b>Begl</b>	<p><b>Begl</b>  Il begl ei adina staus in liug da sentupada. Dils nuegls anora ein ils animals vegni buentai la damaun e sera. La dunnas han fatg lischiva ed ella senaria dasperas ei vegniu caschau e mazzau ils animals da casa.</p>
<b>Clavaus sper Tgès'alva</b>	<p><b>Alpicultura</b>  Avon tschentaners fuvan las alps en possess dalla claustra da Mustér. Per temps ein associaziuns da caschadas naschidas. Entras la soluziun da quellas ein ellas daventadas alps da vischnaunca. Las davosas alps feudalas, che pretendevan in tscheins-fier, ein svanidas igl onn <b>1861</b>, numnadamein Val Val e Val Giuv, lu cu la claustra ha vendiu ellas als vischins da Tujetsch. Il medem ei succediu cun l'alp Tschamut, mo che lezza han ils vischins da Tschmut cumprau dalla claustra e lu vendiu ella igl onn <b>1866</b> alla vischnaunca. Oz ei aunc l'alp da Nalps en mauns buca indigens, la vart dretga, s'auda a pursanavels da Segnas e contuorn, l'autra vart s'auda alla claustra da Mustér. Carteivel possedevan ils signur de Putnengia quella entira alp ed ei lu ida entras avat Pieder de Putnengia vi en possess dalla claustra.</p> <p>Oz vegnan las alps tuatschinas per gronda part era schadas a tscheins ad jasters. Las nuorsas dalla val vegnan actualmeins pasculadas sil Cuolm da Vi ed en Val Strem. Cheu ha il luf dumignau da metter tut sil tgau!</p>

	<p><b>Cauras e caver</b>  La caura ha mattei sur decennis ora giugau ina rolla principala. Ella vala era sco la vacca dil pauper. Il caver da Sedrun veva sias 200 cauras ensemen cun quellas da Gonda. Naven dalla primavera tochen igl atun fuvan ellas sut pastur. La damaun clamava il caver las cauras cun siu tgiern. Ella tastga veva el la marena e la sera mava el en roda a dunsena e survegneva lu la damaun puspei ina tastga cun in bien gentar. La primavera mavan las cauras engiu, quei vul dir da Nalps en. La stad mava il viadi encunter la Val Strem, prendent endadens Praus Strems las cauras e caver da Camischolas. Il caver stueva ir cullas cauras els aults ed ord pastira dils armauls. La sera vegneva returnau ed il caver fageva quella lavur e viadi da 2 uras e mesa l'entira stad e da tutt'aura. Savens eran quei mo buobs da 13/14 onns ed el veva pil pli in tgaun che gidava. Impurtont era ei da vegnir la sera a casa cun tuttas. Meinsvart deva ei cauras che mavan a pastuir. Ellas eran serabitschadas si en in liug nua ch'ellas pudevan buca anavos. Cheu deva ei nuot auter che dad ir per ellas e gidar ni purtar ellas ord il pastuir, quels vevan nums sco per exempel Pastuir digl Albin.</p> <p><b>Nuorsas e nurser</b>  Avon tschentaners fuva la nuorsa igl animal principal en nossa val. Biars onns dils davos decennis dil 19 e 20avel tschentaner, fuva il diember da nuorsas ella val entuorn 1200 tocs. La primavera mavan las nuorsas ton pli gleiti ord nuegl e libramein sillas pastiras. Beingleiti vegnevan ellas lu sut il nurser da primavera. Avon che cargar vegnevan ellas zavradas e per part era tundidas. La zona da nuorsas a Valtgeva fuva vegnida construida per quei intent. Lu mavan las nuorsas ad alp entochen tard igl atun. Il temps da lartg gudevan ellas praus e pradas dalla val. Igl unviern passentavan ellas en zonas e sco vivonda survegnevan ellas beinsavens mo ils rests ord ils pursepens dalla biestga. La nuorsa furneva la launa per la vestagdira e secapescha la carn. Ils tschuts fuvan in bien product da hanletg.</p> <p>Oz dat ei a Sedrun negins purs da nuorsas, denton entgins ella val. Tschercada ei la carn tschut e la launa-nuorsa vala pauc ni nuot.</p>
<p><b>Casa da Fabiola Monn</b></p>	<p><b>Casa tuatschina</b> (stil Gottard)  La casa da Fabiola Monn e famiglia Wagenmann ei aparti biala e veglia e datescha digl onn <b>1832</b>. Ella ei tipica el stil e fuorma da quels onns. Las finiastras ein pintgas per tener il cauld en casa. Ils mugrins sepresentan en fuorma da drags cun lieungas cotschnas per spuentar dalla casa e habitonts ils nauschaspérts.</p>
<p><b>Sut casa da Pio Hendry</b></p>	<p><b>Drun/Run da Sedrun</b>  En in document da <b>1643</b> vegn il dutg che flessegiava giu dil Cuolm da Vi denter Gonda e Sedrun menziunaus, numandamein aschia: Il plevon sa ir naven dalla baselgia da s.Vigeli vin Dulezi cun passar sur in'aissa il dutg (il dutg giu da Cuolm de Vi, pli tard il Run). Zacu el <b>16/17avel</b> tschentaner, entras grondas malauras e moviments ha ei dau sbuadas ella val dil Run ed en cuort temps ei seformau la val dil Run. La tradiziun raquenta ch'il Run mavi da temps en temps en direcziun Camischolas e</p>

	<p>giu el Rein dalla Val Strem e lu puspei en direcziun Sedrun. Ils vischins prendan la sunadonta decisiun: leu nua ch'il Run passa la proxima gada duei el vegnir menaus e duei flessegiar per adina en quella direcziun. Ed igl ei schabgiu ch'il Run ha priu la direcziun Sedrun.</p> <p>Adina puspei ha el smanatschau il vitg da Sedrun cun s'avischinar adina pli fetg al vitg. Il pli fetg ei quei daventau igl onn <b>1834</b>, lu cu il Run ei seviults sill'altezia dalla piazza da giug vi encunter Sedrun e lu priu ina part dil santeri e menau vischals tochen oragiun Druns.</p> <p>Pader Placi a Spescha veva paucs onns avon fatg attents sil prighel e cussegliu co sanar il Run per prevegnir da catastofas. Suenter il schabetg da <b>1834</b> ei vegniu menau si in uor sill'altezia dalla piazza da Giug che ha dirigiù il Run en direcziun Rein Anteriur. Allas malauras da <b>1868</b> ha igl uor teniu petg e schurmegiau Sedrun. Ils onns <b>1960</b> ei il vau vegnius sanaus da sur la punt da viafier entochen sut la punt dil stradun. Quellas frenadas da betun han fatg il siu ed il Run ha buca pli magliu afuns e domesticau empau la forza dallas auas. En ina regularitad sco ina ura vegn il Run segiramein 2 -3 gadas la stad cun differenta forza. Il punct il pli sensibel ei gest sur la via principala. Vess in carpun da bloccar lsut la punt en sche savess l'aua sederscher tut tenor situaziun vi dil Run giu ni schizun vi encunter Sedrun, sin Cadruvi e giu encunter la baselgia. En memoria digl uor e dalla disgrazia da <b>1834</b> ei piazzau il crap digl uor cull'annada <b>1837</b> ella spunda sut la piazza da giugs.</p> <p>Igl ei absolutamein e prudentamein buca da sutschazegiar il prighel dil Run. Denton di la tradiziun:</p> <p style="text-align: center;"><i>Vul ei dar in bien onn en Tujetsch, sche sto il Run da Sedrun vegnir treis ga cotschens.</i></p>
<p><b>Dadens</b> <b>Hotel Cruna</b></p>	<p><b>Ustrias e hotels</b></p> <p>Igl emprem hotel vegn baghegiu a Sedrun, numnadamein il hotel Cruna ils onns <b>1850</b>. Igl onn <b>1857</b> vegn el numnadamein numnaus l'emprema gada en ina gassetta. Avon surveva oravontut la casa pervenda sco liug da dunsena pils paucs hosps e viandonts che traversavan la val pil pli il temps da stad.</p> <p>Igl onn <b>1931</b> ei il Hotel Cruna vegnius engrondius e modernisau. Ina pli radicala midada ed engrondaziun ei sefatga igl onn <b>1993</b>.</p> <p>Il Hotel Alpsu exista dapi ils onns <b>1870</b>, l'ustria vegneva numnada la "Schena". La casa senza era vegnida baghegiada <b>1822</b>.</p> <p>Igl onn <b>1906</b> vegn il Hotel Alpsu baghegiu sco casa da crap. Igl onn <b>1932</b> vegn la part veglia scarpada giu e la "Stiva Grischuna" nescha. Igl onn <b>2014</b> vegn il hotel spazzaus. Previu ein la construcziun da dus hotels, habitaziuns e studios.</p> <p>Embrugls e problems finansials laian anavos ina ruina. Ina dallas duas parcelas digl anteriur hotel Oberalp a Sedrun vegn ingantada la fin da mars <b>2024</b>. L'otra resta vinavon els mauns da Sedrun Spectrum Investment SA.</p> <p>Novas ustrias ein il Hotel Postigliun, l'ustria Fravia e la Baan Na dapi igl onn <b>2024</b>.</p>
<p><b>Plaz Cadruvi</b></p>	<p><b>Scola</b></p> <p>Tochen igl onn <b>1848</b> han caplons che fuvan dapi il 17avel tschentaner</p>

	<p>vegna elegi, buca mo sco gidonters dil plevon en fatgs da baselgia, mobein era per dar scola. La scola era lu buca obligatoria e mintgin/a scolar/ra stueva pagar l'instrucziun.</p> <p>Las empremas scolas vegnan baghegiadas igl onn <b>1848</b>, numnadamein a Sedrun ed a Cavorgia. Rueras suonda igl onn <b>1850</b>; lu sondan Selva <b>1852</b> e Camischolas igl onn <b>1862</b>.</p> <p>Baghetgs moderns e novs vegnan eregi grazia alla midada finanziaria dalla vischnaunca entras l'entschatta dallas entradas da tscheins d'aua ils onns 1950/1960. Rueras retscheiva sia scola nova <b>1959</b> e Sedrun igl onn <b>1962</b>.</p> <p>Oz vegn menau mo ina scola e quei a Sedrun cun actualmeins rodund 80 affons (Igl onn <b>1985</b>: 250 affons da scola).</p>
	<p><b>Vischinadi</b></p> <p>Mintga vitg dalla val ha formau in vischinadi cun empau autonomia mo era cun dabia forza politica, empau sco ina partida dad oz. Magari stueva vegnir formau colligiazions cun plirs vitgs per dumignar atras ina tractanda sin vischnaunca.</p> <p>En graus da pastira da casa e pasculaziun da primavera e stad fuvan ils vischinadis autonomi. Per l'aua da beiber e buentar stuevan els era mirar. La tgira da pastiras era secapescha era lur caussa. Organisar la pasculaziun da primavera, da stad cul paster da casa, il purtger e caver e vischander secapescha era. La scola fuva era ina caussa ch'ils vischins vevan enta maun, oravontut la scola d'avon <b>1848</b>.</p> <p>Era ils emprems onns dils onns <b>1850</b>, cun las scolas novas (Cavorgia, Sedrun, Camischolas, Rueras, Selva/Sut Crestas), ein ils vischins s'engaschai fetg per "lur" scola. Pli tard ei quei lu stau caussa dil generalessers cun in cussegl da scola.</p> <p>Oz ei Sedrun il grond vischinadi. Ella nova organisaziun, en fuorma dad ina uniun, ein era integrats Surrein, Cavorgia e Bugnei ( quei uclaun ei adina staus ina part dil vischinadi da Sedrun).</p> <p>Ils onns <b>1970</b> ei il vitg carschius massivamein en direcziun ost tochen tier la Val Bugnei. Sut via ei il vitg medemamien carschius quels onns naven dil clavau dils Alis (oz casa Giusep Monn). Il baghegiar bein e bi ei quels onns pert part vegniu munchentau. Bia speculaziuns ed ils baghetgs gronds egl ost disturban aunc oz ed han priu il caracter dil vitg d'antruras.</p>
<b>Casa gronda</b>	<p><b>Casas dil 19avel</b></p> <p>Casas fetg grondas ha la vischnaunca giu paucas en cumparegliaziun cun auters vitgs dalla Cadi. A Sedrun, ella part dil vitg vegl, ein quei stai ed ein aunc oz la «Casa Nova», la «Casa Gronda», la casa dils "Monns" e la Tgès'alva construida da crap. Svanidas ein suandontas casas grondas: la veglia "Casa Pervenda", la Schenca, uustria veglia e precedentada dil hotel Alpsu.</p> <p>La casa tradiziunala veva per ordinari il sistem da duas famiglias, las casas d'ina famiglia ei per vegnidadas eregidadas da persunas jastras.</p>
<b>Baselgia S.Vigeli</b>	<p><b>La baselgia da s.Vigeli</b></p> <p>Tgei vitg dalla val ei vegnius fundaus/collonissaus sco emprem? Van ins dalla emprema baselgia cun il santeri anora, sa quei esser mo Sedrun. La tradiziun raquenta ch'ils emprems avdents mavien las dumengias a</p>

Mustér al survetsch divin e quei ella caplutta da s. Gada eregida entuorn **1100**. Leu arrivavien era ils habitonts dalla Val Medel!

Ils emperms fastitgs da Sedrun ein d'anflar egl urbai da **1456** cun la notizia dalla benedicziun e consecraziun dalla baselgia da s. Vigeli igl onn **1205**, ils 26 da zercladur. Sin quei di croda aunc oz la perdanonza da Sedrun che vegn ussa festivada la dumengia la pli vischina da quei datum.

Quella baselgia da **1205** sa tgunschamein era esser stada la secunda baselgia, forsia steva leu avon ina caplutta, documentau ei nuot.

Era denter **1205** e **1691** dat ei negins indecis precis da midadas pli grondas. Igl onn **1515** vegn igl altar gotic, oz altar dalla s.fossa, plazzaus en baselgia sco altar principal. Forsia ha ei da quei temps (**16avel**) dau ina renovaziun/engrondaziun ni silmeins midadas pli grondas.

La baselgia a Sedrun ei stada dall'entschatta enneu patertgada sco baselgia dalla val e quei vul dir che plirs vitgs el vonn dalla val fuvien lu gia fundai. La baselgia ei buca vegnida tschentada si amiez il vitg da Sedrun sco baselgia da vitg, mobein sappientivamein agl ur e bein veseivla da Dieni anora e per tuts vischins dalla val. Plirs onns fuva la baselgia en honor da s. Vigeli il sulet sanctuari dalla val. Rueras, sco secund grond vitg, retscheiva sia caplutta igl onn **1491**. Avon existeva tenor in document da **1368** a Flurin Sura ina caplutta. Las autras capluttas dalla val vegnan eregidas a partir dil **16avel** entochen il **19avel** tschentaner.

Tier la baselgia veglia era ei pusseivel da passar dil chor anora el clutger, aschia descriva il rapport da **1643** davart la baselgia da **1205**. Il clutger era pia plazzaus egl ost dalla baselgia veglia. Ella fuva situada pli anen encunter il Run ed era bia pli pintga. La baselgia formava in dretgangel, il chor haveva arviul, il plantschiu-sura dalla nav denton fuva plats ed ord aissas. El vegneva tenius da duas retschas petgas. Sco altar grond steva igl altar gotic (oz altar dalla s. fossa) cun las statuas da Nossadunna, s.Leci, s. Flurin, s. Vigeli e s.Bistgaun. Dal maun dallas femnas, da vart seniastra, sesanflava in altar da s. Bistgaun. Dasperas fuva la porta dil clutger. Da l'autra vart ornava in altar da Nossadunna dil s.rusari la baselgia. Sper quei altar fuva el mir da maun sut il baptiszeri, ina gallaria da lenn. In pierti da lenn cun il carner serrava giu la baselgia.

El **16/17avel** tschentaner sto il Run ver smanatschau da menar naven la baselgia. Ils vischins dalla val han decidiu da construir ina nova. Igl onn **1691** vegn dau l'entschatta. Carteivel fuva ella era aunc en decadenza ni memia pintga. Encunter sera smanatschava la baselgia da sederscher enagiu ella val dil Run. Per quei ei la nova vegnida construida pli fetg encunter damaun. Il clutger ei staus ed ei ussa el vest dalla baselgia nova. Igl altar principal dad oz da meister Johannes Ritz vegn tschentaus igl onn **1702** en baselgia, ils dus laterals, era ord il luvratori Ritz da Selkingen, denton da ses dus fegls, entuorn **1725**.

Igl onn **1617** retscheiva il clutger roman siu tetg da péz. Avon fuva el cuvretgs cun plattas da crap e veva la fuorma da tenda. Quei onn han ins tratg el ad ault en fuorma da péz e cuvretg cun slondas, pli tard stuors.

	<p>El decuors dil 17avel tschentaner, quasi ina reacziun catolica silla smanatscha dalla reformaziun, ha la pleiv da Tujetsch baghegiu tschun capluttas (Cavorgia, Zarcuns, Giuv, Selva, Surrein) e leutier aunc la baselgia parochiala da s. Vigeli a Sedrun.</p>
	<p>Igl onn <b>1609</b> ei vegniu fundau a Sedrun ina Confraternitad da s.Giachen. Ventgasis Tuatschins fuvan quei onn serendi en Galizia/Spagna tier s.Giachen a Santiago di Compostela. Returnai han els fundau la Confraternitad da s.Giachen. Egl anniversari da <b>1456</b> ein els nudai. Entochen <b>1809</b> ein aunc vegni registrai novs commembers e novas commembras. Silsunter svanescha la cumpignia da s.Giachen e mo pli cudischs e gliestas dils confrars e dallas consoras dattan perdetga d'ina gruppaziun da tempra religiosa da tschels onns.</p>
	<p>La Confraternitad dil s. rusari ei vegnida fundada igl onn <b>1691</b>, igl onn dall'entschatta dalla construcziun dalla nova baselgia. La fiasta dil s. rusari, adina l'emprema dumengia dil meins d'october, ei semantenida entochen al di dad oz. Cugl onn <b>1971</b> calan las registraziuns el register dalla confraternitad.</p>
	<p>La Confraternitad dil s. Scapulier vegn eregida ils 18 da schaner <b>1703</b>. Igl onn <b>1970</b> ei quella fiasta vegnida sliada si. La fiasta vegneva festivada il fenadur cun processiu festiva giu Prau da Vitg. Quei di vegneva tenor tradiziun festivau las primizias.</p>
	<p>L'entira baselgia ei vegnida renovada igl onn <b>1888</b> da rudien tenor plans dil revendissim domvicar Dengler da Regensburg e dalla firma Frars Goss Stadtamhof-Regensburg, Baviera.</p>
	<p>La firma Goss en Baviera furnescha <b>1889</b> ina statua da Nossadunna che las mattauns da Tujetsch han per part pagau. Las tablas dalla via dalla crusch che orneschan aunc oz nossa baselgia dateschan era da quei onn. Igl ei ina lavur ord il luvratori da devoziunalias da Gion Giusep Deplaz da Regensburg, oriunds da Selva. Tuts 14 maletgs cun rama han custau 950. - francs. Igl onn <b>1936</b> ein las ramas vegnidadas reducidas ed igl onn <b>1973</b> ein ellas vegnidadas allontanadas diltuttafatg e <b>2006</b> puspei reconstruidas el stan original.</p>
	<p>Igl onn <b>1919</b> succeda l'installaziun d'ina illuminaziun electrica entras la firma Edgar Lüthy, Bazenheid.</p>
	<p>La baselgia vegn renovada e restaurada ils onns <b>1935/36</b>. Ils altars ein vegni restaurai dalla firma Stöckli, Stans. Josef Malin da Lichtenstein ha fatg la stuccatura ell'entira baselgia. Avon fuvan quellas parts dalla baselgia picturadas cun numerus ornaments.</p>
	<p>La vischnaunca endrezza <b>1979</b> ina caplutta da morts en zuler-baselgia el local digl anteriur archiv da vischnaunca. Il maletg en caplutta ei ina creaziun da Linus Flepp, Mustér, e la finiastra ei ina ovra artistica da Dea Murk, Surava. En quei connex ei era gl'entir zuler vegnius renovaus.</p>

	<p>Igl onn <b>1981</b> succeda ina renovaziun dalla part externa dalla baselgia da s.Vigeli. La miraglia ei vegnida remediada, ligiada giu e dada alv. Il tetg-baselgia ha obteniu plattas d'iom.</p> <p>Il clutger ei medemamein vegnius restauraus. Da sum tocca dem ei la crappa vegnida schubergiada ed il teg dil clutger obtegn in niev tetg ord plattas d'iom.</p>
	<p>La notg dils 7 sils 8 da november <b>1991</b> ein nunenconuschents ruts en en baselgia ed engulau tuttas statuas digl altar gotic dalla s.fossa. La primavera <b>1992</b> ei la statua da Nossadunna vegnida anflada ella vischinonza dad Andermatt. Las autras ein aunc adina sparidas. Oz orneschan statuas reconstruidas il bi altar dalla s.fossa.</p>
	<p>Ils onns <b>2005/06</b> succeda ina restauraziun e renovaziun interna: sanaziun dils mirs e nova color; restauraziun da tuts maletgs al stan original; niev plantschiu ella nav e bugadau ils bauns; restauraziun da tuts altars al stan original; novas finiastras cun rundellas; niev scaldament e nova illuminaziun; sanaziun dil tuchiez e l'ura. Restauraziun dalla lautga ed orgla. Midadas el chor cun novas plattas e l'allontanaziun d'ina retscha da truccas. La fiasta da benedicziun ha giu liug per la fiasta da s.Vigeli, ils 25 da zercladur <b>2006</b>. Ils cuosts totals han muntau 1'397'940 francs.</p>
	<p><b>Altar grond</b></p> <p>Igl altar grond ei dedicaus al patrun-baselgia sogn Vigeli ed ei in'ovra meistrila da Johann Ritz da Selkingen el Valleis.</p> <p>Igl ei stau gl'emprem altar che Ritz ha eregiu el Cantun Grischun.</p> <p>Interessants ei en quei connex il contract denter la pleiv e Johannes Ritz:</p> <p><i>«Im Jahr 1702 den 6. Aprilis, ist ein auffrechter und redtlicher mercht geschehen entzwischen dem kirchen vogt S. Vigelij zu Thawetsch sambt den gesmbten herren einess theilss und den meister Johannes Ritz bildthawer von Walliss zu Seelgen gelegen mit nach vollgenden pacten wie nachvollget: Erstlichen soll dass chor altar gemacht werde nach ausweiung dess abriss sambt den tabernakel in dem fuess einzusezen. zum andern soll die kirchen geben wegen diser arbeit 230 reichss thaler, den halben theil zu bezahlen mit bahrem gelt, den andern mit vüch. letstlichen ist dem meister auff dem mercht geben worden 4 philipp, falss er mit todt abgienge, sollen solche seine Kinder erstatten, und ist solches geschrieben durch mich Ludwig Jagmet, da mahlen pfarherren zu Thavetsch in beysein der herren geschworenen alss namblichen Herrn str. Jacob Durtschey, Herrn str. Jakob Soliwa, Herrn str. Johan Mon und Herrn str. Benedict Siewi, kirchenvogt, den tag und jahr wie obstehet. Ich Johannes Ritz beken wie obstett»</i></p> <p>Igl altar ei ina construcziun da considerabla qualidad, schebein en sia cumposiziun, sco era en ils numerus detagls. Il maletg digl altar che representa il marteri da s. Vigeli ei ina ovra dil pictur Sigisbert Frey da Mustér, malegiaus igl onn <b>1703</b>.</p> <p>Seniester dil maletg stat la statua da s.Pieder e dretg quella da s.Paul. Pli ad ault ei s.Antoni seniester e da l'auter maun s.Leci. Denteren ei tschentada ina biala statua da Nossadunna che va a tschiel e sur quella ina dil s. Bab.</p> <p>Da mintga vart digl altar central sesanflan scaffas da reliquias sut</p>



	<p>baldachins ch'ei vegnidas vitier pli tard, carteivel ina construcziun da Jodok Ritz, feagl da Johann. Il tabernachel ei in'ovra da gronda qualitat meistrila. Suren el pavigliun ei la s.tscheina cun Jesus ed ils apostels presentada. Da mintga vart ha Ritz entagliau quater scenas dalla passiuun da Jesus Cristus.</p> <p>Igl altar ei signaus (davos la statua da s.Paul): IOANNES - RIZ - VON WALS - HAT - DISEN - ALTAR GEMACHT – 1703</p> <p>Igl entir altar grond dumbra 50 aunghels.</p>
	<p><b>Altars laterals</b>          Ils dus altars da mintga vart digl arviul, avon l'entrada el chor, derivan era ord il luvratori da Ritz. Els ein denton buca vegni construi da Johann Ritz, mobein da siu feagl Jodok Ritz. Omisdus ein construi entuorn 1725.</p> <p><b>Altar dretg</b>          Altar da s.Bistgaun. Maletg central, s.Bistgaun, s.Placi, s.Giachen e s.Carlo Borromeus, probabel ina ovra da Sigisbert Frey, Mustér. Dretg dil maletg ina statua d'in uestg nunenconuschent, seniester s.Martin, sul maletg enamez s.Leci, dretg s.Emerita e seniester s.Placi.</p> <p><b>Altar seniester</b>          Altar da s.Brida. Maletg, carteivel era da Sigisbert Frey, s.Brida dall'Irlandia e s.Brida da Sveda sco muniessas. Dretg s.Flurin da Ramuosch, suren s.Mattiu; seniester s.Giusep e suren s.Gion evangelist; enamez suren la statua da s.Bistgaun.</p>
	<p><b>Caplutta vart seniastra</b>          Altar da Nossadunna dil s. Rusari ed altar dallas duas confraternitads, quella dil s. Scapulier e s. Rusari. Igl altar cumpeggia duas petgas ord marmor artificial tgietschen e decoraziuns el stil da rococo. Enamez ina statua da Nossadunna. Entuorn Nossadunna ein tschentai medagliuns culs quendischi misteris.</p> <p>Igl altar ei vegnius construius culla baselgia nova da 1691. Igl onn 2005 ei igl entir altar vegnius restauraus el stan original. Il manti da puorpra picturaus, igl umbrival dretg e seniester digl altar, ch'era cuvretgs, ei puspei vegnius refatgs al stan original.</p>
	<p><b>Caplutta vart dretga</b>          Altar dalla s. fossa. Quei altar gotic s'auda denter ina dallas custeivladads dalla baselgia parochiala. Tenor il rapport da visitaziun da 1643 consisteva igl altar principal da gliez temps ord elements da quei altar gotic.</p> <p>Igl artist da quella biala lavur ei deplorablamein buca enconuschents. Igl altar d'entuorn 1515 ei vegnius restauraus 1888, ils maletgs igl onn 1934 da dr. Lausser. La restauraziun da 2005 ha contribuui alla bellezza cumparsa actuala.</p> <p>El centrum vesein nus Nossadunna cul Bambin, seniester s.Vigeli uestg (patrun-baselgia) e s. Bistgaun culs paliats; dretg s. Brictius uestg e s. Leci cun rucla e stab.</p> <p>Suren decoraziuns da feaglia e denter relievs d'utschals ed aunghels s.Flurin ed in uestg.</p> <p>Sin l'ala, porta, dretga s. Ursula cul paliet e s.Brida (seunda paztruna dalla baselgia); sin l'ala seniastra s.Catrina e s.Barla cul calisch.</p> <p>Giudem igl altar ella predella Cristus ed endisch apostels. La predella ei</p>

	<p>nova, digl onn <b>1888</b>, las figuras denton originalas.  Il maletg sin las alas serradas representa la viseta dils treis s. retgs a Betlehem.  Davos igl altar, buca veseivel, il maletg cun Cristus ed ils giuvnals egl Iert dallas ulivas.  Ella meisa digl altar cun duas portas ei Jesus tschentaus en fossa, ina figura da <b>1888</b>. Sin las portas aviartas dus aunghels sco guardia.  Suren diltut ina custeivla statua da Cristus.  Igl onn <b>1991</b> ein tuttas 22 statuas vegnidas enguladas. La statua da Nossadunna ei vegnida anflada la primavera <b>1992</b> ed ei oz deponida en in liug segir. Tuttas statuas ein reconstruidas tenor fotografias d'in artist dil Tirol dil Sid igl onn <b>1999</b>.</p>
<p><b>Clutger</b></p>	<p><b>Viseta el clutger</b>  Altezia dil clutger: 41.95 meters (naven dil terren entochen alla fin dalla crusch-clutger). Egl intern meinan ..... scalems tochen ella stiva dils zenns (scalas da purs e scalas ordinarias). - Buca adattau per tuts!!</p> <p><b>Zenns:</b>  <b>Zenn grond:</b> Diameter 124 cm; tun: cis'; peisa: ca. 1050 kg. Inscriziun:  TU NOCUOS IM(B)RES INIMICOS TU AERIS AUSUS CHRISTI  MERITUM TU PROCUL HINC AGITO.  SANCTA MARIA ORA PRO NOBIS MDCCCXXI (1821) J.B.MONZINI  FUDIT Maletgs: s.Flurin, s.Giachen il vegl, s.Roc e crucifigaziun.  <b>Secund zenn:</b> diameter: 110 cm; tun: g'; peisa: ca. 780 kg.  A CUNCTIS POPULUM PROTEGE CHRISTE MALIS  SANCTE VIGILI ORA PRO NOBIS. J B M F (J.B. Monzini fudit)  MDCCCXXI (1821)  Maletgs: s. Murezi, s. sacerdot, s. Michel e crucifigaziun.  <b>Tierz zenn:</b> vegn era numnaus zenn talianer; diameter 99 cm; tun: gis';  peisa: ca, 500 kg. Inscriziun:  FISSAM RESTITUIT FIDES PIETASQUE PARENTUM.  HEU MEMORI GRATUS MENTE IZEPONE PIOS.  S.ANTONI ORA PRO NOBIS  J B M F (J.B. Monzini fudit) MDCCCXXI (1821)</p> <p>Quels treis zenns ein vegni culai a Mustér en santeri da s.Gion igl october <b>1821</b> da J.B. Monzini da Bergamo.</p> <p><b>Quart zenn:</b> diameter 70 cm; tun: c'; peisa: ca. 190 kg. Inscriziun:  ET VERBUM CARO FACTUM EST ET HABITAVIT IN NOBIS ANNO  <b>1759</b> A.K. (Anton Kaiser) ZUG  Maletgs: Immaculata, s.Michel, s.Antoni da Padua, crucifigaziun.  <b>Zenn pign:</b> diameter 50 cm; tun: gis'; peisa: ca 100 kg cun l'inscripziun:  SANCTA MARIA ORA PRO NOBIS <b>1816</b>  Culaus da niev <b>1906</b> dalla firma Rüetschi ad Aarau.  Maletgs: Nossadunna, s.Clau da Flia</p> <p><b>Tuccar</b>  Dapi <b>1965</b> vegn buca pli tucchau a maun. Avon pendevan las tretschas dils zenns giudem el clutger. Tuccar fuva la domena dils buobs. Els vegnevan ad uras per saver tucchar e reservavan lur zenn ed astgar tucchar cun tener</p>

	<p>la tretscha. Il caluster deva las ordras tgeinins ei fuva da tucclar.</p> <p><b>Ura-baselgia</b>  Entuorn ils anno <b>1920/1930</b> ei l'emprema ura vegnida plazzada sil clutger el nord ed el vest dil clutger. En clutger exista aunc in mecanissem vegl cul sistem da dar las uras.</p>
<b>Detgas e historias</b>	<p><b>La praula dils treis cavals</b>  Inagada vegneva in da Surrein neu a Sedrun a messa. Cu el ei staus giu sur la punt digl uaul Surrein ha el viu leu a pasculond treis cavals che vevan si bellezza sialas. El seglia sin in da quels e quel porta el cun ina stermentusa spertadad lunsch, lunsch naven en tiaras jastras. Tutteninaga er'el ord il mund ed el Tirol e saveva buca co. En buca ditg eis el vegnius ellas miserias ed avon che murir dalla fom ha el pertgirau pors in tshuppel onns. In di ha el entupau ina femna veglia, che saveva romontsch. Quei er'ina che saveva pli che mo far si paun. Quella ha lu dau d'entellir ad el, co el stoppi far per vegnir a casa. El stoppi gl'emprem ira cheu e cheu e lura anfliel in cavagl cun si siala; el dueigi lu siglir sin quel e setener vid la bèra. Cura ch'el seigi sper la mar dueigi el siglir sin tschei cavagl che seigi leu, epi seigi el gleiti a casa. Il da Surrein ha fatg sco la veglia ha detg ed ei staus en in giena, gie, spert sco il cametg, giu sper la punt digl uaul Surrein. Cheu tucav'ei grad da nozzas. „Tgi o nozzas?“ ha el dumandau. Quella e quella ha in detg e quei era sia atgna dunna, che maridava cun in auter. Sin quei eis el currius sin baselgia e sco ch'el ei staus leu el mument ch'il prer leva enzinnar en ils spus, tila el sia capetscha avon igl altar. Sin quei ha il prer dumandau, tgei ch'el vegli. Il da Surrein ha lu detg, ch'el seigi igl um da quella spusa. Sin quei ha il prer buc'enzinnau en quels dus, mo il gentar da nozzas han ei tuttina magliau e giu legher. - Quels dus han lu aunc viviu ditg ensemen e sch'els ein buca morts, sche vivan ei aunc ussa!</p>
	<p><b>Quel dalla scola nera</b>  In scolar dalla scola nera ha detg inagada siper ils da Sedrun, che sil Drun ella greppa seigi in grond scazi zuppau. Mo negin ha vuliu pagar ad el enzatgei da cavar sido quel e perquei ei il scazi aunc adina zuppaus el Drun.</p>
	<p><b>La buoba loscha</b>  Sin Tschamut fuva ei igl usit ch'in vischin stueva pertgirar ils pors las fiastas a casa. Quei mava en roda. Inagada ha ei tucchau ad ina matta ualti luschara ed adina beinvestgida. Quella fuva buca cuntenza ch'ella saveva buca ira a Sedrun a Sontgilcrest cullas mattauns. Ella leva buca pertgirar ils pors. Perquei ha ella dau tissi a siu piertg e la damaun era il piertg ventschius e cu tuts auters fuvan pinai per ira giu Sedrun ha ella griu suenter ad ina outra: "Giu culla purschalla!  Si culla tshupella! Miu piertg ei schluppaus!"  Ella ha fatg ina sgnocca per buca stuer star a casa ed ei ida cun las outras a far Sontgilcrest. Per castitg eis ella vegnida scungierada suenter la mort sil Badus. Si leu ha ella stuiu star ella greppa dumengias e luvardis.</p>
	<p><b>L'ura ei cheu</b></p>

	<p>Sut Sedrun eran duas mattauns vid il zerclar. Tutenina han ellas udiu ord igl uaul sut Cavorgia ina vusch che scheva: L'ura ei cheu, mo igl um ei buca cheu. Cuort suenter arriva in um sil meglier tut a spruns dils Plauns Sedrun giu ed ha detg: Jeu stoi spert ir a pinar in badugn giuls Rovens. Las zerclunzas, che vevan gest udiu il clom misterius, sminavan nuot bien e levan retener igl um, mo quel ha buca schau metter giud via. Returnond igl um buca anavos da miezdi, han las zerclunzas temiu ed ein immediat idas egl uaul sut Cavorgia per mirar, tgei che seigi schabegiau, e lu han ellas anflau igl um morts spel badugn giu.</p>
	<p><b>Ei vegn saung ord il pegn</b>  In per umens da Sedrun eran i enta Pardatsch vid la sort. Cu els han entschiet a resgiar in pegn, sei vegniu o saung. Mond ils umens encunter casa, han ei udiu il zenn da miert. Quel ha tuccau dus cuors, ed ils umens han immediat saviu, ch'ina femna seigi morta.</p>
	<p><b>Strias</b>  In di ch'ei era fiasta gronda a Sedrun, pertgirava in buob las vaccas sin Vons. Duront ch'ei fageva messa giu la val, ein duas bialas mattauns en resti da fiasta, vegnidas tiel buob. Il buob ha schon enconuschiu ellas. Las mattauns han risdau legramain e sturnegiau cul buob. El ha dumandau ellas, pertgei ch'ellas seigien buc idas a messa. Ellas han detg, quei astgi el buca saver ed el dueigi dir a negin carstgaun, ch'el hagi viu ellas cheu, schiglioc fetschien ellas el schi manedels, che las gaglinas sappien magliar si el. Quei paster ei ius plitard giul Schuob. Suenter plirs onns eis el turnaus a casa. El ha dumandau, sche quellas mattauns vivien aunc. Ina vivi aunc, ed ina seigi morta, han ei detg. Quei e stau avon circa tschien onns. Quei buob veva num Celestin. Miu bab ha enconuschiu el bein.</p>
	<p><b>Zagrenders</b>  A Selva ei ina zagrendra ida en ina casa ed ha dumandau la mumma da casa in cavegl da sia buoba. La mumma ha dau in; e suenter in temps, cu ils zagrenders eran naven da Selva, ha la buoba stuiu ir suenter quels. O Sedrun ha ella pudiu suenter. Ils da Sedrun han vuliu far star anavos la buoba, mo ils zagrenders han detg: "Nus duvrein nuota la buoba, nus essan gliud avunda. Ella vegn suenter senza che nus lein." Lu ein quels da Sedrun i dallas Cavorgias ora e stai o Mustér avon ch'ils zagrenders. Lu ein ei i sin claustra a far vegnir giu gl'avat. Lez ei vegnius giu e dau ina benedicziun alla buoba, ed aschia han ins pudiu retener ella. La buoba ha detg, ch'ella seigi buca ida voluntariamain, ella stuevi ira. Ella seigi vegnida tratga cun stermentusa forza e savevi buca star ni risdar pli.</p> <p>Ina zagrendra ei era ida en ina casa giu Surrein. En quella casa er'ei ina biala buoba. La zagrendra ha dumandau la mumma in cavegl da quella buoba. La mumma ha buca dubitau bien ed ei ida si surcombras. Leu vevan ei pendiu si la cua dad ina vacca, per in spuentamustgas ni per regurdientscha dad ina vacca. La mumma ha tratg or'ina zaicla e dau quella dalla cua alla zagrendra. Quella ha priu la zaicla ed ei ida. Ell'era in pulit mument naven, che la cua si surcombras</p>

	<p>ha entschiet a semuentar e mava per las surcombras entuorn a fuss ida tra las preits, sche la mumma vess buca aviert ina finiastra. E lu seigi la cua ida via da Sontg Antoni giu ed hagi suatiu ils zagrenders o sut Bugnei.</p> <p>Sut la caplutta veglia da Sontg Antoni giu Surrein ei in plaz, nua ch'ei resta buca si neiv igl unviern. Leu ha ina banda da zagrenders satrau ina veglia zagrendra viva. Ils da Surrein schevan: «Glied viva setiaran ins buca. Quella lein nus salvar, quell'ei aunc vescla. »Mo ils zagrenders han detg: «Na, na, cun otgont'onns sei finiu! Ella sto dar giu.» Lu han ei satrau la veglia viva. Quei liug enconusch'ins aunc oz. Gl'unviern dat ei ina fessa en la neiv, ch'ins vesa il terren.</p>
	<p><b>La baselgia da Sedrun</b>  Gl'emprem levan ei baghegiar la baselgia da Sedrun sin Cadruvi sut la via nova. Ei trevan la crappa sin Cadruvi, mo la damaun era la crappa giu sin quei prau, nua la baselgia stat oz. Ins ei secussegliai sin vischnaunca da baghegiar ella giu leu, nua ch'ella stat oz.  La crappa pil clutger e crappa tagliada da natira, quella deva ei en Burganez. Per quella crappa seigien ei i en e purtau ora las dumengias sunter viaspras, tut la gliued, umens a femnas ed affons. Mintgin purtavi, sco el pudevi; ils affons predevan in pign, e quei vegnev'ora in detg magliac crappa.</p>
	<p><b>Ir en sien</b>  Inagada er' ei in um da Sedrun, ch'era ius ad uaul giun Cavorgia. Cu el ei vegnius a casa la sera sper ina gronda preit-crap vi, ha el schau dar la sigir sur la preit-crap giu ed ei era aschi spuret, ch'ei era nunpusseivel dad ira giu per ella. Ei er'ina fetg buna sigir. El steva vieti mal. Lu eis el ius a casa. La notg ha el semiau dalla sigir, ed el ei levas en sien ed ei ius per la sigir. E cu el ei staus puspei avon casa, eis el sedestadaus e veva la sigir enta maun. En sien sa quei schabegiar. Quei fan las olmas.</p>